



UNIVERSITÄTS-
BIBLIOTHEK
PADERBORN

Universitätsbibliothek Paderborn

Außlegung der Episteln vnd Euangelien: von Ostern bis auff das Aduent

Luther, Martin

Wittemberg, 1547

VD16 L 5614

7 Des heiligen Geistes zeugnis im hertzen/ vnd desselben eusserlich
warzeichen.

urn:nbn:de:hbz:466:1-37032

scheffen der Gnaden vnd liebe Gottes gegen im/ bleibe jmer in sorgen vnd engsten des zorns vnd verdammis/ vnd weil es in solchem zweinel stehet/ fleuch es fur Gott/ vnd kan in nicht anruffen.

Aber widerumb/ wo der Glaube Christi ist/ da wircket der heilige Geist im hertzen/ beide/ solchen trost vnd gewisliche kindliche zuuersicht/ die nicht zweinelt an Gottes gnedigen willen vnd erhörung/ Weil er beide/ gnade vnd hülffe/ trost vnd erhörung zugesagt hat/ nicht auff vnser würdigkeit/ sondern auff Christi/ seines Sons/ namen vnd verdienst. Von diesen beiden wercken des heiligen Geistes/ Trost vnd Anruffen/ sagt auch der Prophet Zacharias am 12. Das Gott wolle eine neue Predigt vnd werck im Reich Christi anrichten/ da er werde ausschütten den Geist der Gnaden vnd des Gebets/ Das ist eben der selbige Geist/ der vns versichert/ das wir Gottes Kinder sind/ vnd vnser hertz treibet/ das wir zu im schreien mit herzlichem anruffen.

Das Ebreische wort (Abba) welches heisse (wie er selbs deutet) Lieber Vater/ ist das ruffen/ wie ein junges Kind lin/ so der Erbe ist/ aus einfeltiger/ kindlicher zuuersicht mit seinem Vater laller/ vnd im ruffet/ Ab/ Ab/ Denn es ist das leichteste Wort/ so ein Kind kan reden lernen/ oder wie die alte deudsche sprache auch schier leichter geredet hat/ Etha/ Etha.

Solch einfeltig/ kindlich wort redet auch der Glaube zu Gott durch den heiligen Geist/ aber aus tieffem hertzen vnd (wie er hernach sagt) mit vnaussprechlichem seufften/ sonderlich/ wenn er in kampff vnd nöten ist/ wider das zweineln des Fleisches/ vnd des Teufels schrecken vnd plagen/ Das er sich dagegen wehren mus/ vnd sagen/ Ah lieber Vater/ Du bist ja mein lieber Vater/ denn du hast ja deinen einigen lieben Son für mich gegeben/ darumb wirstu ja nicht mit mir zürnen/ noch mich verstoßen/ Jeem/ Du siehest meine not vnd schwachheit/ darumb wollestu mir helfen vnd retten etc.

Der selbige Geist gibt zeugnis

vnserm Geist/ das wir Gottes Kinder sind.

Als wir Gottes Kinder sind/ vnd vns gewislich dafür halten mögen/ das haben wir nicht von vns selbs/ noch aus dem Gesetz/ Sondern es ist des heiligen Geistes zeugnis/ der wider das Gesetz vnd das fülen vnser unwirdigkeit solchs zeuget in vnser schwachheit/ vnd vns des gewis macht.

Solch zeugnis gehet also zu/ das wir die krafft des heiligen Geistes/ so er durchs Wort in vns wircket/ auch fülen vnd empfinden/ vnd vnser erfahrung mit dem Wort oder Predigt ober ein stimmet/ Denn das kanstu je bey dir fülen/ wo du in not vnd angst trost empfehest aus dem Euangelio/ vnd da mit solchen zweinel vnd schrecken ober windest/ das dein hertz festiglich schliessen kan/ du habest einen gnedigen Gott/ vnd nu nicht mehr für im fleust/ sondern in solchem Glauben in frölich anruffen kanst/ vnd hülffe von im gewarten/ Vnd wo solcher Glaube bestehet/ so folget auch die erfahrung/ das dir geholfen wird/ Wie S. Paulus Rom. 5. sagt/ Gedult bringet erfahrung/ Erfahrung bringet hoffnung/ Hoffnung aber leste nicht zu schanden werden.

Das ist das rechte innerliche zeugnis/ dabey du erkennest/ das der heilige Geist in dir wircket/ Daneben hastu auch eusserliche zeugnis vnd warzeichen/ das er dir gibt/ sonderliche gaben/ feinen geistlichen verstand/ gnade vnd glück zu deinem beruff etc. Das du lust vnd liebe hast zu seinem Wort/ das selbe für aller Welt bekennest/ mit fahrleibs vnd lebens/ Jeem/ das du den gottlosen wesen vnd sünden feind wirst vnd widerstehest etc. Welches alles nicht thuen noch vermögen die vns christen/ so den heiligen Geist nicht haben. Wiewoles war ist/ das auch noch dieses bey den Heiligen in grosser schwachheit zugehet/ aber doch der heilige Geist in solcher schwachheit die Christen registert/ vnd solch zeugnis stercket/ Wie abermal S. Paulus sagt/ Der Geist hilfft vnser schwachheit auff etc.

r Sind

Auslegung der Epistel/

Sind wir dem Kinder/so sind wir auch Erben/ nemlich/ Gottes Erben/ vnd Miterben Christi/ So wir anders mit leiden/ auff das wir auch mit zur herrlichkeit erhaben werden.

DA hörestu der Christen hohē rhum/ ehre vnd herrlichkeit/ Lass der Welt ire pracht/ hofart vnd ehre/ welche ist nicht anders/ (wenn es zum höchsten vnd letzten Kompt) denn/ das sie des Teufels Kinder sind. Aber rechne du selbs/ was dis sey/ das ein armer elender Sünder sol diese ehre haben bey Gott/ das er heisse/ nicht ein Knecht oder Diener Gottes/ sondern Gottes Son vnd Erbe.

Der Christ
hohe ehre
vnd herrlich
keit/ Gottes
Kinder sein

Solt doch ein Mensch/ ja alle Welt wündschen/ wenn es möchte erwündschet werden/ das sie möchte Gottes Rue oder Frossch heissen/ damit sie nur den rhum möchte haben/ das sie Gott angehört/ vnd sein eigen were? Denn wer wolt nicht gerne dieses Herrn vnd Schepffers sein? Tu spricht er/ das wir/ die an Christum glauben/ sollen nicht seine Knechte vnd Megde/ sondern seine eigen Söhne/ Töchter vnd Erben sein. Wer wil das gnug preisen vnd aussprechen? Ist es doch nicht aus zu reden noch zu begreifen.

Aber hie findet sich die große menschliche schwachheit in vns/ Denn wenn wir das recht vnd vngeweiuelte glauben/ wo fur wolten wir vns fürchten/ vnd wer wolt oder künde vns schade thun? Denn wer da kan von hertzen sagen zu Gott/ Du bist mein lieber Vater/ vnd ich dein Kind/ Der wird freilich allen Teufeln aus der Hellen trotz bieten/ vnd aller Welt dreyen vnd pochen frölich verachte/ Denn er hat ja an diesem Vater einen solchen Herrn/ dafür alle Creaturn erzittern müssen/ vñ on seinen willen nichts vermögen/ So hat er auch solch Erbe vnd Herrschafft/ daran im keine Creatur kan schaden noch abbruch thun.

Er setzet aber allhie auch das stück lin dazu/ So wir anders mit leiden/ Damit wir wissen/ das wir auch mus-

sen also leben auff Erben/ vnd vns bes weisen/ als frome gehorsame Kinder/ die dem Fleisch nicht folgen/ vnd vmb dieser herrschafft willen leiden/ was vns widerferet/ vnd dem Fleisch wehe thut/ Wenn wir das thun/ so sollen vnd mögen wir vns des herrlich trösten/ vnd mit warheit wol streuen vnd rhumen/ Wie er gesagt hat/ Welche der Geist Gottes treibet/ das sie nicht dem Fleisch folgen/ die sind Gottes Kinder. O welch ein gros ding ist es vmb einen Menschen/ der da nicht folget seinen lusten/ sondern den selben widerstehet/ mit starkem Glauben vnd leiden. Es heisse ein grosser Adel/ ehre vnd herrlichkeit auff Erden/ eines mechtigen berümpften Königs oder Kaisers Kind sein/ wie viel höher were es/ wenn sich jemand künde warhafftig rhümen des höchsten Engels Son? Aber was ist das alles/ gegen de/ der da heisse vnd ist von Gott selbs genennet vnd erwelet/ ein Son vnd Erbe der hohen götlichen Mafestet/ Denn solche Kindschafft vnd Erbe mus freilich ein grosse vnaussprechliche herrlichkeit vnd reichthumb/ gewalt vnd ehre bringen/ vber alles was im Himmel vnd Erden ist.

Diese ehre (wenn wir auch sonst nichts den solchen namen vñ rhum davon hetten) solt vns ja allein bewegen/ das wir diesem sündlichem leben auff Erden feind würden/ vnd mit allen krefftten dawider strebeten/ solten wir auch alles darob lassen vnd leiden/ was ein Mensch leiden kan. Aber es gehet ins Menschen hertz nicht/ vnd ist zu gar vber sinne vnd gedanken/ was solche ehre vnd herrlichkeit sey/ dazu wir sollen mit Christo erhaben werden/ Wis S. Paulus solchs im folgenden Text weiter ansüret/ da er spricht/ Ich halte es dafür/ das dieser zeit leiden/ der herrlichkeit nicht werd sey/ die an vns sol offenbaret werden etc. Wie wir droben am vierden Sontag gehöret haben.

Euangel